



**BROM TOP  
IM ALBUM  
YU**

Text is copyrighted by the Bible Society of Australia. Used by permission.

Bat God bin shoum wi imbin laigim wi detmatj, dumaji wen wibin stil nogudbala pipul, det taim na Jisas Kraiss bin deigim pleis blanga wi en dai blanga wi.

—Romans 5:8

Wal wen imbin gulijap taim blanga abum det Pasoba serramoni, Jisas bin sabi imbin taim blanga im blanga gowei brom dis wel en gobek langa im dedi langa hebin. Wal olawei Jisas bin laigim detlot wekinmen blanga im, en imbin shoum olabat brabliwei haumatj imbin laigim olabat.

—Jon 13:1

En Jisas Kraiss im gudbinji langa yumob du, en im garra

album yumob jidan gudbalawei du. Wal Jisas Kraiss na bin gidap laibala brom det greibyad basdam. En im tok trubalawei blanga God, en im na det boswan blanga ola bos langa ebri kantri. En im laigim wi, en imbin weistim im blad blanga wi blanga meigim wi fri brom ol wi nogudbalawei.

—Rebaleishan 1:5

“God bin laigim ebribodi detmatj, en imbin jandim im ronwan san blanga dai blanga olabat wulijim ebribodi hu bilib langa im garra abum det olagijawan laif en nomo dai. En mi na det san blanga im.” Lagijat na Jisas bin tak.

—Jon 3:16

## NOMEDA JISAS IM GOD BAT IMBIN KAMAN JIS LAIK WI

Wal lagijat imbin hepin langa det yanggel, dumaji God bin tok im garra hepin lagijat na. Longtaim wan speshalwan mesinja blanga God bin tok langa bailbul blanga dis ting. Imbin tok, “Wan singulwan yanggel deya garra abum beibi. Lilboiwan im garra abum, en dei garra gulum im neim Imenyuwel.” Lagijat na det mesinja bin tok, en garram det Hibu langgus det neim im tok, “God im iya garram wi.”

—Methyu 1:22, 23

Trubala ai dalim yu. God bin shoum wi brabli bigbala ting iya.

Nobodi bin sabi dis ting bifo. Bat wi sabi na hau blanga jidan trubalawei blanga God. Yu sabi wanim mi toktok? Imbin kaman garram bodi laik wi, en det Holi Spirit bin shoum wi trubala im det san blanga God, en ola einjul bin luk langa im, en loda pipul bin spredimatbat det wed blanga im langa ebri kantri, en pipul brom ebri kantri bin bilib langa im, en God bin deigimbek im langa hebin.

—Fes Timathi 3:16

Jisas bin tok; “En mindubala main dedi mindubala wanbala.”

—Jon 10:30

En if enibodi jandap en tok Jisas na det san blanga God, wal im jidan joinap garram God, en God jidan joinap garram im du.

—Fes Jon 4:15

Wal det einjul bin tok langa meri, “Det Holi Spirit garra kaman, en God pawa garra jidan langa yu. Lagijat na yu garra faindim det beibi, en blanga tharran na det beibi im speshalwan, en dei garra gulum im God san.”

—Luk 1:35

Wal wen Pida bin stil toktok, wan bigwan klaud bin kamat langa olabat, en det shedo bin gaburumap olabat, en deibin irrim God bin tok brom det klaud.

Imbin tok, “Dijan main san, en mi laigim im brabli, en yumob garra lisin langa im.”

—Methyu 17:5

Wal Jisas bin tok, “Yubin olredi luk langa im, en mi im na toktokbat langa yu.”

—Jon 9:37

Ol detkain wed nomo kamat brom Jisas Krais, dumaji wen imbin iya langa dis wel, God bin jidan holbit langa det bodi blanga im.

—Kalosiyans 2:9

Jon bin beptaisim ola pipul, imbin beptaisim Jisas, en Jisas bin prei, en det skai bin opinap, en det Holi Spirit bin kamdan langa im jis laiga berd, en God bin tok brom hebin. Imbin tok, “Yu na main ronwan san.”

—Luk 3:21-22a

Wal Jisas bin sabi wanim deibin tok miselp, en imbin dalim olabat. Imbin tok, “Yumob blanga dis wel iya gin, dumaji yumob bin kaman brom dis kantri. Bat ai nomo bin kaman brom dis kantri. Aibin kaman brom top.” Wal Jisas bin tok, “Trubala ai dalim yumob. Mi na mi. En aibin jidan bifo Eibrahem bin bon.”

—Jon 8:23 en 58

Wal det gel bin tok, “Ai sabi det boswan gulum Masaiya garra kaman, en wen im kaman, im garra dalim wi ebrijing.” Wal Jisas bin tok, “Mi im na jandapbat iya toktok langa yu.”

—Jon 4:25, 26

“Yumob sabi? Wen mi iya langa dis kantri, mi na det lait blanga ola pipul langa dis kantri.” Lagijat na Jisas bin tok langa im wekinmen olabat.

—Jon 9:5

Wal Jisas bin dalim im. Imbin tok, “Mi na meigim pipul gidap laibala brom dedbala. En mi na gibit olabat laif. En nomeda detlot pipul hu bilib langa mi maitbi garra dai, bat stil dei garra gidap laibala.”

—Jon 11:25

Yumob gulum mi titja, en yumob gulum mi bos. En yumob garra gulum mi titja en bos. En im rait lagijat, dumaji mi na titja en bos blanga yumob.

—Jon 13:13

## **SAMBALA KLEBABALA TING JISAS BIN DUM 5**

Wal Jisas bin tok, Wal yumob gajim detlot daga en det dubala fish, en imbin lukap langa top, en imbin gibit teingks langa God, en afta imbin breigim detlot daga en fish, en imbin gibit langa im wekinmen olabat, en deibin gibitat det daga en fish langa detlot pipul. Wal ebribodi bin dagat na, en deibin ol sedisfaid, en afta detlot wekinmen bin bilimap twelbala baskit garram ola leftobawan daga en fish. Det namba blanga detlot men hubin dagat deya bin 5000, en dei nomo bin kaundimap ola wuman en biginini olabat. —Methyu 14:18-21

Wen dubala blainwan men bin irrim Jisas bin kaminap, dubala bin stat jinginat. Dubala bin tok, “Grensan blanga Deibid! Yu sori langa mindubala!” Wal wen Jisas bin irrim dubala, imbin stap, en imbin askim dubala. Imbin tok, “Wanim yundubala wandim mi blanga dum blanga yundubala?” Wal det dubala blainwan men bin tok, “Bos, mindubala wandim yu garra meigim mindubala luk.” Wal Jisas bin sori langa dubala, en imbin pudum im bingga langa dubala ai, en streidawei det dubala blainwan men bin luk, en afta dubala bin bulurum Jisas. —Methyu 20:30 en 32-34

## JISAS KRAIS BIN MEIGIM EBRIJING EN IM BOSWAN DU

Wal God na bin meigim ebrijing, en imbin meigim det plen du. Bat imbin blandim det plen raidap tudei. —Ifishans 3:9b

Jisas bin meigim ebrijing weya wi gin luk en ebrijing weya wi kaan luk, en imbin meigim ola einjul en olkain spirit en olkain pawa en ola bos ebriweya langa graun en langa hebin. God bin meigim ebrijing thru Jisas Kraiss, en imbin meigim ebrijing blanga Jisas Kraiss du. —Kalosiyans 1:16

God bin meigim ebrijing garram det Wed. Im nomo bin meigim enijing nomo garram det Wed. —Jon 1:3

Bat tudei im tok langa wi thru det san blanga im. Garram im na God bin meigim ebrijing, en imbin pikimat im blanga jidan bos blanga ebrijing. —Hibus 1:2

En blanga tharran na Jisas Kraiss bin dai en imbin gidap laibala brom dedbala wulijim im garra jidan bos blanga laibala pipul en dedbala pipul du. —Romans 14:9

God bin pikimat yumob blanga jidan garram Jisas Kraiss det san blanga im, en wi sabi God garra dum wanim imbin pramis. —Fes Karinthiyans 1:9

# JISAS KRAIS GARRA KOTIM EBRIBODI LANGA DIJAN KANTRI

7

Wal Timathi, ai garra gibit yu woning na, dumaji God en Jisas Kraiss dubala iya. En ai garra gibit yu dis woning, dumaji wen Jisas Kraiss garra kambek blanga jidan king, im garra kotim ola laibala pipul en ola dedbala pipul.

—Sekan Timathi 4:1

Wal Jisas bin kipgon tok langa im wekinmen olabat. Imbin tok, “Yumob sabi na? Det stori im dalim yumob hau ai garra gibit det prais langa ola pipul wen ai garra kambek. En wen ai garra kambek blanga jidan bos, ai garra kambek garram det shainiwan lait main garram main einjul

olabat, en ai garra jidan langa det speshalwan tjeya weya oni king lau jidan, en detlot einjul garra majurumap ola pipul brom ebri kantri langa mi, en ai garra kadimat olabat langa dubala mob jis laik det stakmen kadimat ola gudwan ship brom ola nogudwan ship.

—Methyu 25:31, 32

Wal yumob dalim mi na. Wotfo yumob kotim yumob kristjan braja olabat? Wotfo yumob oldei reken miselp haibala langa olabat? Yumob nomo wandi dum lagijat, dumaji wi garra ol jandap lida langa God, en im na garra kotim wi holot. —Romans 14:10

## JISAS KRAIS NA BIN PEI BLANGA LARRAMGO YU FRI

Jisas bin dalim olabat. “Yumob sabi? Mi na det raitwan geit blanga go langa God. En if enibodi kaman langa mi blanga go langa God, wal God garra seibum im, en im garra jidan brabli fri, en im garra abum det brabli gudwan laif.”  
—Jon 10:9

Wal Jisas bin dalim im. Imbin tok, “Mi na det wei, dumaji mi det trubalawan weya gibit laif. En nobodi kaan go langa main dedi. Oni detlot pipul hu sabi mi gin go langa main dedi.”  
—Jon 14:6

Jisas bin tok, ‘Yumob garra dai, dumaji yumob bulurum det nogudbalawei.’ “Wal mi na mi. En

if yumob kaan bilib langa mi, wal yumob garra dai blanga ol detlot nogudbala ting weya yumob oldei dumbat.” Lagijat na Jisas bin tok.  
—Jon 8:24

En afta wen imbin (Jisas) sabi det wei thru det trabul, God bin meigim im jidan det wei weya im garra seibum ol detlot pipul hu duwit langa im.  
—Hibrus 5:9

Yu si? Jisas gin oldei seibum enibodi hu wandi kaman langa God thru im, dumaji im jidan laibala olagijawan, en im gin oldei askimbat God blanga im.

—Hibrus 7:25

# JISAS KRAIS NA BIN PEI BLANGA LARRAMGO YU FRI

9

En Jisas Kraiss na det wei blanga wi blanga sabi God. Im na meigim wi jidan raitwei langa God, en im na meigim wi jidan ronwan pipul blanga God, en im na larramgo wi fri brom ola nogudbala ting weya wi oldei dumbat. —Fes Karinthiyans 1:30

Wal im (Jisas) na bin gibit miselp blanga wi blanga meigim wi fri brom ola nogudbalawei, en imbin gibit miselp blanga klinim wi en meigim wi holot blanga im. En imbin dum lagijat langa wi blanga meigim wi wandi dumbat ola gudbala ting brabliwei.

—Taidas 2:14

En yumob garra gibit teingks langa wi Dedi (God) gudbinjiwei, dumaji im na bin meigim wi jidan raitwei langa im wulijim wi garra gedim ol detlot gudbala ting weya imbin pramis blanga gibit langa detlot pipul hu garram det lait blanga im, en imbin seibum wi brom det pawa blanga det dakbalawei, en imbin bringimap wi blanga jidan garram im brabli ronwan san, (Jisas), en im san na bin pei blanga larramgo wi fri brom ol detlot nogudbala ting weya wibin oldei dumbat.

—Kalosiyans 1:12-14

## JISAS KRAIS BIN WEISTIM IM BLAD BLANGA MEIGIM YU FRI

Dumaji wen Jisas Kraiss bin weistim im blad, imbin meigim wi fri, en God bin larramgo wi fri brom ol detlot nogudbala ting weya wibin oldei dumbat. Trubala ai dalim yumob. God im brabli kainbala.

—Ifishans 1:7

En yumob garra oldei teiknodis langa God en rispek langa im, dumaji yumob sabi wanim God bin dum blanga baiyimbek yumob brom det olwan nogudbala laif weya yumob grenfatha olabat bin hendimdan langa yumob brom longtaim. Im nomo bin pei garram gol en silba weya oldei binij. Nomo. Imbin pei garram det

ronwan blad blanga Jisas Kraiss hubin jis laiga lilwan ship nomo garram enijing rong.

—Fes Pida 1:18, 19

En if det buligi blad en gout blad bin meigim enibodi fri atsaidwei, wal det blad blanga Jisas bin dum mowa. Thru det olagijawan spirit blanga im Jisas bin gibit miselp jis laiga brabliwan sekrifais ofring langa God, en det blad blanga im garra meigim wi fri insaid langa wi hat brom ol detkain wek weya kaan meigim wi jidan laibala, en det blad im meigim wi fri blanga wek blanga det laibalawan God.

—Hibrus 9:14

# GOD BIN SEIBIM WI DUMAJI WIBIN BILIB LANGA JISAS

11

Wal God bin seibum yumob wen yumob bin bilib langa Jisas Kraiss dumaji imbin abum det kainbala filing blanga yumob. Im nomo bin seibum yumob dumaji yumob bin gudbala, en im nomo bin seibum yumob dumaji yumob bin dum gudbala ting. Imbin seibum yumob dumaji imbin wandi siebum yumob imself, en dumaji imbin seibum yumob lagijat, wal nobodi kaan reken miselp na. —Ifishans 2:8, 9

Wal God bin meigim wi jidan raitwei langa im dumaji wibin bilib langa Jisas Kraiss, en blanga tharran na wi jidan garram God

gudbalawei, dumaji Jisas Kraiss det bos blanga wi bin meigim det wei blanga wi blanga jidan gudbalawei garram God. —Romans 5:1

“Yu garra bilib langa det bos Jisas Kraiss, en God garra seibum yu en yu femili olabat.” —Eks 16:31

Wal detlot pipul bin askim im. Deibin tok, “Wanim melabat garra dum blanga dum det wek weya God wandim melabat blanga dum?” Wal Jisas bin tok, “Dijan na det wek weya God wandim yumob blanga dum. Im wandim yumob garra bilib langa mi, dumaji im na bin jandim mi.” —Jon 6:28, 29

Wal wi garra gibit teingks langa God det dedi blanga Jisas Krai det bos blanga wi. Im na det brabli kainbala dedi, en im na det God hu oldei album wi. Yumob sabi? Nobodi kaan album wi. Oni God na. —Sekan Karinthiyans 1:3

Bat God bin shoum wi imbin laigim wi, en imbin gud langa wi, en imbin seibum wi. Im nomo bin seibum wi dumaji wibin dumbat gudbala ting. Wibin oldei dumbat nogudbala ting. Imbin seibum wi dumaji imbin fil sori blanga wi, en imbin seibum wi garram det Holi Spirit blanga im. Det Holi Spirit bin klinim wi, en imbin meigim wi

bon igin, en imbin gibit wi nyubala laif. —Taidas 3:4, 5

Bat God im brabli kainbala, en im laigim wi detmatj, en nomeda wi nomo bin oldei lisin langa im en wibin jis laiga dedbala, bat stil imbin joinimap wi langa Jisas Krai en meigim wi laibala brom dedbala. Imbin seibum wi, dumaji im brabli kainbala en im bin wandim wi. —Ifishans 2:4-5

Yu garra jidan kambala jis laik yu dedi God im kainbala.

—Luk 6:36

God im brabli kainbala langa ol detlot pipul brom ebri jinareishan hu rispek im. —Luk 1:50

## JISAS IM WANDIM YU BLANGA GO LANGA IM 13

Det spirit blanga God en det pramis blanga Jisas, dubala dalim Jisas. Dubala tok, “Yu kaman na!” En ebribodi hu lisen langa dubala tok lagijat garra lafta tok lagijat gin. Dei garra tok, “Yu kaman na!” En if enibodi thestibala, en im wandim det woda blanga laif, wal im gin gajim, dumaji det woda im friwan.  
—Rebaleishan 22:17

Wal wen Jisas bin luk detlot wekinmen blanga im bin lagijat, imbin gitwail langa olabat, en imbin tok, “Yumob nomo andimwei ol detlot biginini. Yumob lar-ram olabat kaman iya langa mi, dumaji ola pipul hu meigim miselp

lobala jis laik dislot biginini garra jidan garram God.” —Mak 10:14

“If enibodi garram loda wori, en im nokap brom det wori jis laiga men weya im garrimap hebiwan loud, wal im garra kaman langa mi, en ai garra deigidawei det wori, en meigim im jidan gudwei. Yu kaman en bulurum mi, dumaji det wei blanga mi im nomo adwan, en mi nomo meigim miselp haibala. Yu garra len brom mi, en ai garra meigim yu jidan gudwei, dumaji aibin meigim det wei langa main dedi isiwan, en det nyuwan lau weya ai garra gibit yu im nomo adwan.” Lagijat na Jisas bin tok.  
—Methyu 11:28-30

Yumob sabi na hu detlot biginini blanga God en hu detlot biginini blanga det boswan dibuldibul? Enibodi hu nomo dum rait ting en nomo laigim im braja olabat, im na nomo blanga God biginini. —Fes Jon 3:10

Wal ol wi pipul hu bulurum det Holi Spirit jidan jis laiga san blanga God, dumaji God nomo bin gibit wi det Holi Spirit blanga meigim wi bradin en jidan jis laiga prisana. Imbin gibit wi det Holi Spirit blanga meigim wi jidan jis laiga san blanga im, en det Holi Spirit meigim wi tok langa God lagijat, “Dedi.” —Romans 8:14, 15

En blanga tharran na God det bos blanga wi bin tok wi garra gowei brom detlot pipul hu nomo blanga im pipul. Wi garra kadimat miselp brom olabat, en wi kaan joinin langa enijing weya nomo gudwan. En God bin tok im garra gudbinji langa wi, en im garra jidan dedi blanga wi, en wi garra jidan san en doda blanga im. —Sekan Karinthiyans 6:17, 18

Wal sambala kantrimen blanga im bin wandim im. En sambala najalot pipul bin wandim im du, en deibin ol bilib langa im. En blanga tharran na imbin gibit olabat det rait blanga jidan biginini blanga God. —Jon 1:12

Yumob sabi? Wi garra jidan gudbalawei jis laik pipul hu jidan langa lait. Wi kaan git drangk en go sili, en wi kaan silipsilipbat garram enibodi en shoum miselpodi eniweya, en wi kaan faitfaitbat en jelas gija. Nomo. Wi kaan dumbat detkain nogudbala ting lagijat, dumaji wi garra bulurum det wei blanga Jisas Kraiss det bos blanga wi, en wi garra stap jingabat ol detlot nogudbala ting weya det nogudbala filing blanga wi oldei wandim.

—Romans 13:13, 14

Wal wi sabi wanim pipul jingabat insaid, dumaji wi gin luk wanim pipul dumbat. Pipul silip-

silip garram enibodi olkainwei. Pipul bulurum olkain drimin en dumbat olkain nogudbala doktabala ting. Pipul meigim miselp bedfren en faidabat. Pipul jelas en gitwail en meigim miselp haibala. Pipul kadimat miselp en agamin gija en jelas gija. Pipul git drangk en go sili. Ol detkain ting na pipul dumbat. Wal ai dalim yumob jis laik aibin dalim yumob basdam. Detlot pipul hu oldei jidan lagijat kaan go langa God deya langa hebin. —Galeishans 5:19-21

Wal yumob nomo wandi jidan drangginbala, dumaji det grog im deigidawei yumob en meigim yumob laif nogud. —Ifishans 5:18

## YU GIN TRAI JIDAN GUDWEI, BAT THARRAN IM NOMO NAF

Wan men bin ran langa im, en imbin buldan lida langa im, en imbin askim im. Imbin tok, "Gudbala titja, wanim ai garra dum blanga abum det olagijawan laif?" Wal Jisas bin dalim im. Imbin tok, "Wotfo yu gulum mi gudbala? Oni God imself im gudbala. Yu kaan gulum enibodi gudbala. Wal yu sabi detlot lau, indit? Yu nomo medrim enibodi. Yu nomo silip garram naja men waif. Yu nomo stilimbat. Yu nomo dalimbat laiya. Yu nomo trik-imbati enibodi. Yu garra rispek langa yu mami en dedi." Wal det men bin tok, "Titja, aibin bulur-

rum ol detlot lau brom lilboita-im." Wal Jisas bin luk langa det men, en imbin laigim im, en imbin tok, "Oni wan ting deya yu nomo bin dum. Yu garra gobek en selim ola enijing blanga yu, en yu garra gibit ol detlot mani langa ola pow-an pipul. Wen yu dum lagijat, yu garra jidan ritjwan langa Godwei, en afta yu garra kaman en bulur-rum mi." Wal wen det men bin lis-in Jisas bin tok lagijat, imbin gida shok, en imbin gowei nogudbinji, dumaji imbin ritjmen, en im nomo bin wandi gibitawei ol detlot enijing weya imbin abum.

# YUMOB NOMO LARRAM ENIBODI TRIKIMBAT YUMOB

17

En yumob garra meiksho yumob sabi dijan iya weya ai garra dalim yumob, dumaji nobodi kaan trikim God. Wal yumob jingabat det fama. Wen im growimap gadin, im oldei gedim det seimkain daga weya imbin growimap gin. Yu si? Im lagijat gin langa wi laif.

—Galeishans 6:7

Wal yumob nomo wandi larram enibodi trikibat yumob garram laiyawan wed en meigim yumob bilib langa olabat en bulurum det nogudbalawei blanga olabat. Trubala ai dalim yumob. God garra panishim ol detlot pipul hu

dumbat detkain nogudbala ting en nomo lisin langa im.

—Ifishans 5:6

Wal if yu reken yu garra lisin langa det wed garram yu irriwol en afta yu gin libum, wal yu rong deya, dumaji yu kaan oni lisin langa det wed. If yu lisin langa det wed, yu garra duwit.

—Jeims 1:22

Bat yumob nomo wandi reken miselp haibala langa yumob braja olabat, dumaji yumob nomo haibala langa olabat. En if yumob reken miselp haibala, wal yumob trikibat miselp gin.

—Galeishans 6:3

## 18 DETLOT NOGUDBALA TING WEYA WIBIN OLDEI DUMBAT GARRA MEIGIM WI DAI

Wal wi sabi longtaim wen God bin meigim dis wel, ebrijing bin gudbala. Bat det men neim Edam bin dum nogudbala ting, en imbin dai, dumaji imbin dum det nogudbala ting. En blanga tharran na ebribodi garra dai, dumaji ebribodi dumbat nogudbala ting.

—Romans 5:12

Bat detlot pipul hu bulurum det ronwan filing blanga olabat oldei jinggabat langa olabat main wanim det filing blanga olabat wandim, en det nogudbala filing blanga olabat garra meigim olabat dai, dumaji det nogudbala

filing jidan bos blanga olabat main, en detkain nogudbala main meigim olabat jidan enami blanga God.

—Romans 8:6, 7a

“Ol detlot pipul hu nomo bilib langa mi en ol detlot pipul hu jidan nogudbala en ol detlot medra en ol detlot pipul hu oldei silipsilip garram enibodi en ol detlot laiynbala en ol detlot pipul hu oldei dumbat olkain klebabala ting en ol detlot pipul hu oldei weshipbat enikain sheip, wal ol detlot pipul na garra jidan langa det bigbala faiya. Deya na dei garra dai sekantaim.” Lagijat God bin tok. —Rebaleishan 21:8b

# JISAS KRAIS BIN BIDIM OL DETLOT NOGUDBALA TING WEYA MEIGIM WI DAI

19

En wi sabi trubala im det san blanga God, dumaji imbin gidap laibala brom dedbala, en det Holi Spirit shoum wi du trubala im det san blanga God garram pawa.

—Romans 1:4

Wal afta wen Jisas bin tok lagi-jat, imbin jingat adbala. Imbin tok, “Lesaras! Yu kamat!” En streidawei Lesaras bin gidap, en imbin kamat taidap garram detlot bendij brom fut raidap langa hed. En Jisas bin dalim detlot pipul deya blanga deigmat detlot bendij en larramgo im. —Jon 11:43, 44

Wal wen Jisas bin luk det widogel, imbin fil sori blanga im,

en imbin dalim im. Imbin tok, “Yu nomo krai.” En imbin go en tatjam det stretja garram det bodi, en ol detlot men hubin garrimap det stretja bin stap, en Jisas bin tok, “Yangmen, ai dalim yu. Gidap!” En det dedbala men bin gidap, en imbin stat toktok.

—Luk 7:13-15a

“Mi na det Laibalawan. Aibin dai basdam. Bat afta aibin gidap laibala, en mi jidan laibala olagija. Mi na det brabliwan bos blanga greibiyad. Nobodi nomo lau dai if mi nomo larram. Mi na bos blanga laif.” Lagijat na Jisas bin tok langa Jon. —Rebaleishan 1:18

Jisas bin tok, "Yu garra laigim God brabliwei. Yu garra gibit miselp laif langa im. Brabliwei yu garra gibit miselp langa im, en yu garra abum filing oni blanga im, en yu garra oldei jinggabat im langa yu main.' Tharran na det topwan en brabli haibala lau."

—Methyu 22:37, 38

Wan men bin askim Jisas, "Gudbala titja, wanim ai garra dum blanga abum det olagijawan laif?" Wal Jisas bin dalim im. Imbin tok, "Wotfo yu gulum mi gudbala? Oni God imselp im gudbala. Yu kaan gulum enibodi gudbala. Wal yu sabi detlot lau, indit? Yu nomo medrim enibodi.

Yu nomo silip garram naja men waif. Yu nomo stilimbat. Yu nomo dalimbat laiya. Yu nomo trikimbat enibodi. Yu garra rispek langa yu mami en dedi." Wal det men bin tok, "Titja, aibin bulurum ol detlot lau brom lilboitaim." Wal Jisas bin luk langa det men, en imbin laigim im, en imbin tok, "Oni wan ting deya yu nomo bin dum. Yu garra gobek en selim ola enijing blanga yu, en yu garra gibit ol detlot mani langa ola powan pipul. Wen yu dum lagijat, yu garra jidan ritjwan langa Godwei, en afta yu garra kaman en bulurum mi."

—Mak 10:17-21

Wi kaan blandim enijing brom God. Im luk ebrijing, dumaji ebrijing jidan opin langa im, en langa im na wi garra onap en dalim miselp. —Hibus 4:13

“En im lagijat na langa det wed blanga God. Wen im blandim det wed blanga im, afta im garra shoum det wed. En wen im gaburumap det wed blanga im, afta im garra meigim det wed kamat langa opin weya ebribodi gin sabi.” —Luk 8:17

Pida bin dalim olabat. Imbin tok, “Wal God im sabi wotkain filing ebribodi garram insaid, en imbin gibit im Holi Spirit langa detlot Jintail pipul seimwei laik

imbin gibit langa wi, en wen imbin gibit olabat im Holi Spirit, imbin shoum wi im laigim olabat du.”

—Eks 15:8

Wal Jisas bin tok basdam langa im wekinmen olabat. Imbin tok, “Yumob garra wotjim miselp blanga det wei blanga detlot serramonimen gulum Ferasi, dumaji olabat tufeis. Dei oldei dum gudwan ekshan atsaidwei blanga gaburumap ola nogudwan ting weya dei oldei dumbat. Enijing weya yumob trai engaburumap, God garra meigim detting kamat, en yumob kaan blandim enijing weya nobodi kaan sabi.

—Luk 12:1b-2

## 22 GOD GARRA PANISHIM OL DETLOT PIPUL HU DUMBAT NOGUDBALA TING OLAGIJA

En wen det dei garra kaman weya God garra kotim ebribodi, im garra hepin lagijat na. Bambai ai (Jisas) garra jandim main einjul olabat blanga gajimbat ol detlot pipul hu oldei dumbat nogudbala ting iya langa dis kantri, en detlot einjul garra gajim detlot pipul hu oldei meigim najalot pipul dumbat nogudbala ting du, en detlot einjul garra tjakam olabat langa det bigbala faiya weya dei garra kraikrai en jidan nogudbinji garram loda pein.

—Methyu 13:41, 42

Wal God im yusum det seimwan wed blanga im blanga

meigim ola skai en ola graun kipgon jidanbat raidap det taim weya im garra kotim ebribodi en binijimap ola pipul hu nomo bulurum im, en det taim na det wed blanga im garra meigim ola skai en ola graun bernap garram faiya.

—Sekan Pida 3:7

“Brom deya ai garra jandimwei ol detlot nogudbala pipul langa det pleis weya God garra panishimbat olabat olagijawan, en ai garra jandim ol detlot gudbala pipul langa det pleis weya God garra gibit olabat det olagijawan laif.” Lagijat na Jisas bin tok.

—Methyu 25:46

Wal God im laigim wi, en im meigim wi laigim gija brabliwei, dumaji im wandim wi garra jandap strongbala nomo sheim langa det laswan dei wen im garra kotim ebribodi. En wi garra jandap strongbala lagijat langa det laswan dei, dumaji tudei langa dis wel weya wi jidan, wi jidan seimwei laik Jisas Kraiss bin jidan.  
—Fes Jon 4:17

Yu si? Ebribodi garra dai wantaim, en afta God garra kotim olabat.  
—Hibus 9:27

En im (Jisas) garra kotim ebribodi, en im garra peiyimbek ebribodi blanga ola nogudbala

ting weya deibin dumbat langa dis laif, en im garra peiyimbek ebribodi blanga ola gudbala ting weya deibin dumbat langa dis laif du.  
—Sekan Karinthians 5:10

En im (God) garra gibit ebribodi feyago. Im na bin pikimat det taim blanga abum det kotkeis, en imbin pikimat det men hu garra jidan bos langa det kotkeis du, en imbin shoum wi imbin pikimat im, dumaji imbin meigim im gidap laibala brom dedbala. —Eks 17:31

Yumob sabi na? Wi holot garra dalim miselp langa God, en wi garra dalim im blanga ebrijing weya wibin dumbat.  
—Romans 14:12

“God im nogudbinji langa detlot pipul hu meigim miselp haibala. Bat im gudbinji langa detlot pipul hu meigim miselp lobala.”  
—Fes Pida 5:5b

Yu si? Jisas Krajs det bos blanga wi bin brabli kain langa wi. Nomeda imbin brabli ritjwan wen imbin jidan langa hebin, bat stil imbin meigim miselp powan wen imbin godan langa dis wel blanga album wi. Yumob sabi? Imbin meigim miselp powan wulijim wi garra jidan ritjwan garram im pawa.  
—Sekan Karinthiyans 8:9

En nomeda pipul bin oldei dumbat nogudbala ting detmatj,

bat stil God bin brabli kain langa pipul detmatj du. Yu si? Pipul bin oldei dum nogudbala ting, en detlot nogudbala ting weya deibin oldei dumbat bin oldei meigim olabat dai. Bat God bin brabli kain langa wi, dumaji imbin meigim wi jidan raitwei langa im thru Jisas Krajs det bos blanga wi, en imbin gibit we det olagijawan laif weya kaan neba binij.  
—Romans 5:20b, 21

God bin abum detkain filing blanga wi, en imbin shoum wi det filing blanga im wen imbin gibit wi ola enijing friwan thru Jisas Krajs det brabliwan san blanga im.  
—Ifishans 1:6b

## TENIM MISELP BROM DET NOGUDBALAWEI 25

Jisas bin tok, “Ai dalim yumob. If yumob nomo tenim miselp brom yumob nogudbalawei, wal yumob garra ol dai jis laik olabat bin dai.”  
—Luk 13:3

Jon bin tok, “Yumob garra tenim miselp brom det nogudbalawei, dumaji im gulijap taim blanga det bos blanga wi garra kaman.”  
—Methyu 3:2

Wal Pida bin tok, “Yumob garra libum yumob nogudbalawei, en yumob garra beptais garram det neim blanga Jisas Kraiss, en afta God garra larramgo yumob fri en gibit yumob det Holi Spirit weya imbin pramisim. “Wal yu-

mob garra tenim miselp brom det nogudbalawei blanga yumob en gibit miselp langa God, en afta im garra larramgo yumob fri brom ol yumob nogudbalawei, en im garra tjakidawei ol detlot nogudbala ting weya yumob bin dum. If yumob gibit miselp langa im, wal det boswan garra meigim yumob, nyubala en det gudbala taim garra kaman.”  
—Eks 2:38; 3:19, 20

“Wal God bin oldei larramgo fri ola pipul hubin dum detkain ting, dumaji dei nomo bin sabi im. Bat tudei na im dalim olabat blanga tenim olabat selp brom det nogudbalawei blanga olabat.”  
—Eks 17:30

## 26 GOD LARRAMGO YU FRI BROM DETLOT NOGUDBALA TING WEYA YU DUMBAT

“En if yu larramgo fri enibodi hu dumbat nogudbala ting langa yu, wal wi dedi (God) langa hebin garra larramgo yu fri du.” Lagijat na Jisas bin tok. —Methyu 6:14

Wal wen Jisas bin luk olabat, imbin sabi deibin bilib langa im brabli, en imbin tok langa det leimbala men. Imbin tok, “Main fren, ai larramgo yu fri brom det nogudbalawei blanga yu.” —Mak 2:5

“Wal main kantrimen olabat, mindubala wandim yumob garra sabi oni thru Jisas na God gin larramgo yumob fri brom yumob nogudbalawei. . . . Imbin lidimap

im (Jisas) en meigim im jidan langa im raidensaid. God bin meigim im jidan boswan, en imbin pikimat im blanga seibum ola pipul. God bin dum lagijat, dumaji imbin wandi gibit ola Isreil pipul tjens blanga libum det nogudbalawei blanga olabat en kaman langa im, en afta im garra larramgo olabat fri brom ol detlot nogudbala ting weya deibin oldei dumbat. —Eks 13:38; 5:31

God bin tok “Ai garra larramgo olabat fri brom olabat nogudbalawei, en ai kaan jingabat enimo ol detlot nogudbala ting weya deibin dumbat.” —Hibrus 8:12

# JISAS BIN KAMAN BLANGA KADIMAT DETLOT PIPUL BLANGA IM

27

Wal yumob garra faindat wotkain ting oldei meigim God gudbinji, en yumob kaan joinin langa ol detlot nogudbala ting weya kamat brom det dakbala. Yumob garra shoum ola pipul detlot ting brom det dakbalawei olabat brabli nogud.

—Ifishans 5:10, 11

Wal yumob irrim mi na. Yumob kaan laigim dis wel, en yumob kaan laigim ola ebrijing blanga dis wel du, dumaji if yumob laigim dis wel, wal yumob nomo laigim det dedi langa top. Yumob sabi? Ebrijing weya yumob bodi wandim, im blanga dis wel. En

ebrijing weya yumob luk en wandim, im blanga dis wel du. En ebrijing weya meigim pipul laigim miselp, im blanga dis wel du. Ol detkain ting na blanga dis wel. Detkain ting nomo kaman brom wi dedi langa top. Ol detkain ting kaman brom dis wel igin.

—Fes Jon 2:15, 16

Wal ol yumob pipul reken miselp kristjan pipul. Bat yumob nomo bulurum God brabliwei, dumaji yu laigim ola enijing langa dis wel. En if yu laigim ola enijing langa dis wel, wal yu meigim miselp bedfren langa God.

—Jeims 4:4

## 28 WEN YUBIN TJEINJIM YU LAIF EN BOLURRUM JISAS, YUBIN BON IGIN

Wi garra jinggabat pipul gudbalawei, dumaji wen enibodi joinap garram Jisas Kraiss, im jidan nyuwan, en det olbalawei blanga im gowei, en det nyubalawei kaman.

—Sekan Karinthiyans 5:17

Wal Jisas bin ensim im. Imbin tok, “Trubala ai dalam yu. Nobodi kaan jidan garram God. Oni detlot pipul hubin bon igin gin jidan garram im.” Wal det serramonimen bin tok, “Bigbala men kaan bon igin! Im kaan gowin langa im mami binji en bon igin sekantaim!” Wal Jisas bin tok, “Trubala ai dalam yu. Nobodi

kaan jidan garram God. Oni detlot pipul hubin bon garram woda en garram det Holi Spirit gin jidan garram God. “Yu sabi? Det bodi im faindim bodi, en det Holi Spirit faindim spirit.”

—Jon 3:3-6

Wal yumob garra kipgon laigimbat gija brabliwei. Nomo oni atsaidwei, bat insaidwei brom yumob hat, dumaji det wed blanga God bin meigim yumob bon igin. Det wed nomo odinriwan wed weya garra binij. Nomo. Det wed im laibalawan weya kaan neba binij. Im jidan olagijawan.

—Fes Pida 1:23

# YUBIN DAI GARRAM DET NOGUDBALAWEI 29 DUMAJI YUBIN JOINAP GARRA JISAS KRAIS

Yu si? Yumob garra oldei jinggabat en wandim detlot gudbala ting deya langa hebin, dumaji yumob bin gidap laibala garram Jisas Kraiss, en im jidan deya na raidensaid langa God. En yumob garra oldei jinggabat ol detlot gudbala ting na. Nomo detlot nogudbala ting iya langa dis graun. Yumob kaan jinggabat detlot nogudbala ting, dumaji yumob bin dai langa det olbala laif, en det brabliwan laif blanga yumob im deya garram Jisas Kraiss. —Kalosiyans 3:1-3a

En ol detlot pipul hu jidan blanga Jisas Kraiss bin libum det

nogudbala laif blanga olabat. Im jis laik deibin kilim miselp en bini-jimap ol detlot ebrijing weya olabat bodi bin oldei wandi dumbat. Wal if det Holi Spirit bin gibit wi laif, wal wi garra bulurum im en larram im jidan bos blanga wi laif. —Galeishans 5:24, 25

Nomo. Wi kaan kipgon dumbat nogudbala ting, dumaji wibin dai langa detlot nogudbala ting... Wal seimwei wi garra jinggabat miselp. Wibin dai, en wibin kadof brom detlot nogudbala ting, en wi jidan laibala blanga God na, dumaji wibin joinap garram Jisas Kraiss. —Romans 6:2 en 11

Jisas bin tok, en ai dalim yu. Mi na det speshalwan men, en dei garra lidimap mi langa kros seimwei laik Mosis bin lidimap det sneik langa det deset kantri, en ebribodi hu bilib langa mi garra abum det olagijawan laif.

—Jon 3:14, 15

En ebribodi hu bilib langa det san garram det olagijawan laif. Bat detlot pipul hu nomo duwit langa det san kaan abum det olagijawan laif, en God garra panishim olabat olagijawan.

—Jon 3:36

“Trubala ai dalim yumob. If enibodi irrim main wed en bilib main dedi hubin jandim mi, wal

im garram det olagijawan laif, en nobodi kaan panishim im, dumaji main dedi bin larramgo im fri brom det olbalawei weya bina meigim im dai olagijawan, en im jidan garram det olagijawan laif na.”

—Jon 5:24

If yu dum enijing eniwei blanga meigim miselp sedisfaid, wal det ting garra kambek langa yu nogudbalawei, en yu ronwan laif garra meigim yu dai. Bat if yu dum ebrijing blanga meigim det Holi Spirit gudbinji, wal det ting garra kambek langa yu gudbalawei, en det Holi Spirit garra meigim yu jidan garram det olagijawan laif. —Galeishans 6:8

# YU SABI GOD BIN GIBIT YU DET OLAGIJAWAN LAIF

31

Wal det Holi Spirit bin kaman,  
en imbin jidan garram det spirit  
blanga wi, en dubala shoum wi, wi  
jidan biginini blanga God.

—Romans 8:16

Wal iya na det wed blanga God.  
Im tok God bin gibit wi det  
olagijawan laif, en im san na det  
olagijawan laif. En enibodi hu  
garram im san garram det  
olagijawan laif. En detlot pipul hu  
nomo garram im san nomo gar-  
ram det olagijawan laif. Wal aibin  
raidimbat dis leda langa yumob  
pipul hu bilib langa Jisas Krai  
det san blanga God, en aibin

raidimbat dis leda blanga meigim  
yumob sabi brabliwei yumob  
garram det olagijawan laif.

—Fes Jon 5:11-13

Wal God bin jandim det Holi  
Spirit blanga im san blanga jidan  
insaid langa wi hat, dumaji wi san  
blanga God du, en det Holi Spirit  
na meigim wi tok langa God  
lagijat, “Dedi.” —Galeishans 4:6

En wi sabi wi jidan joinap  
garram God en im jidan joinap  
garram wi, dumaji imbin gibit wi  
det Holi Spirit blanga im.

—Fes Jon 4:13

Yu si? Imbin jis laik wibin dai garram Jisas Kraiss. En wi nomo jidan laibala garram wi ron laif na. Nomo. Jisas Kraiss gibit wi laif, dumaji im jidan garram wi, en dis laif na weya wi jidan, wi bulurum det san blanga God hubin laigim wi en bin gibit miselp blanga wi. —Galeishans 2:20

Wal Jisas bin tok, “Enibodi hu laigim mi garra duwit langa main wed, en main dedi garra laigim im, en mi en main dedi garra kaman langa im en jidan garram im.”

—Jon 14:23

Yumob sabi? Bifo nobodi bin sabi Jisas Kraiss garra jidan insaid langa wi. Bat tudei wi sabi,

dumaji God bin pikimat det rait taim blanga shoum wi wanim im wandim garra hepin langa ebribodi. Jisas Kraiss jidan insaid langa wi. —Kalosiyans 1:27b

Wal wi dedi im brabli haibala, en im garram olkain brabli gudwan ting, en mi oldei askim im blanga gibit yumob pawa garram im Holi Spirit blanga meigim yumob jidan strongbala insaid, en mi oldei askim im blanga meigim Jisas Kraiss jidan insaid langa yumob dumaji yumob bilib langa im, en mi oldei askim im blanga meigim yumob dumbat ola gudbala ting dumaji yumob laigim God en ola pipul. —Ifishans 3:16, 17

# YU GARRA DUWIT LANGA DET BOSWAN BRABLIWEI

Wi kaan dumbat ola nogudbala ting, dumaji wen yu gibit miselp langa sambodi blanga duwit langa im, yu meigim miselp wekinmen blanga im. Yu si? If yu meigim miselp wekinmen blanga det nogudbalawei, wal det nogudbalawei meigim yu dai. Bat if yu meigim miselp wekinmen blanga God en duwit langa im, wal im meigim yu jidan raitwei langa im. —Romans 6:16

Im garra deigidawei ola trabul brom melabat, en im garra meigim wi jidan gudbalawei. Wal God garra deigidawei ol detlot trabul en peiyimbek detlot pipul,

en im garra dum tharran det taim na wen Jisas Kraiss det bos blanga wi garra kambek garram ola brabli strongbala einjul blanga im. Jisas Kraiss garra kambek garram brabli hotwan faiya blanga panishim detlot pipul hu nomo sabi God. Im garra panishim detlot pipul hu nomo bin lisin langa det gudnyus blanga im, en im garra panishibat olabat brabliwei olagijawan, en dei kaan jidan garram im. Dei garra jidan longwei brom im, en dei garra jidan longwei brom det shainiwan lait blanga im. —Sekon Thesaloniyans 1:7b-9a

## 34 YU GARRA TOK, "JISAS KRAIS IM BOS" EN YU GARRA BILIB BRABLIWEI LAGIJAT DU

En dei garra tok, "Jisas Krais im brabli bos." En dei garra preisim God det dedi blanga wi.

—Falipiyans 2:11

Jisas bin tok, "Ai dalim yumob. If enibodi tok gudbalawei blanga mi langa ola pipul, wal ai garra tok gudbalawei blanga im langa main dedi du wen im garra kotim ebribodi langa hebin. Bat if enibodi tok nogudbalawei blanga mi langa ola pipul, wal ai garra tok nogudbalawei blanga im langa main dedi du." —Methyu 10:32, 33

En if enibodi jandap lida langa ola pipul en tok, "Jisas Krais im bos." en if im bilib langa im hat

brabliwei God bin meigim Jisas Krais gidap laibala brom dedbala, wal God garra seibum im, dumaji wen enibodi bilib langa Jisas Krais, God meigim im jidan raitwei langa im, en im seibum im dumaji im tok, "Jisas Krais im bos." —Romans 10:9, 10

Dei gibit bekbom langa dubala mijamet, dumaji wen enibodi gibit bekbom langa det san, im gibit bekbom langa det dediwan du. En wen enibodi wandim det san brabliwei, im wandim det dediwan du, en det dedi en san dubala garra jidan garram im mijamet.

—Fes Jon 2:23

# SEITIN NA DET BOSWAN DIBILDIBIL EN IM 35 OLDEI WANDIM FAIT LANGA YU

Wal yumob garra jingabat gudbalawei en wotjim miselp, dumaji det boswan dibuldbul na det enami blanga yumob, en im oldei go ebriweya jis laiga hanggriwan laian weya im go lukabat daga blanga dagat, dumaji im oldei lukabat enibodi blanga deigidawei im brom God.

—Fes Pida 5:8

Bambai wen God garra deigidawei det samting, det taim na det brabli wikitwan men garra kamat, en im garra kaman garram pawa brom Seitin, en im garra dumbat olkain klebabala ting, en im garra yusumbat olkain

laiyawan stori en ekshan blanga meigim ola pipul bulurum im.

—Sekan Thesaloniyans 2:9

Brom deya det Holi Spirit bin deigim Jisas langa bush blanga larram det boswan dibuldbul neim Seitin temtimbat im. Wal Jisas bin tok, “Yu gowei brom mi, Seitin. Ai kaan dum wanim yu wandim, dumaji im tok langa baibul, ‘Yu garra weship langa God, dumaji oni im na bos, en yu garra wek blanga im.’” Brom deya det dibuldbul bin gowei brom Jisas, en ola einjul bin kaman langa Jisas, en deibin album im. —Methyu 4:1 en 10, 11

Bat detlot pipul hu oldei dumbat nogudbala ting, olabat blanga det boswan dibuldibul, dumaji det boswan dibuldibul bin dumbat nogudbala ting brom longtaim wen God bin meigim ebrijing. En det san blanga God bin kaman blanga binijimap ol detlot nogudbala ting weya det boswan dibuldibul bin dum.

—Fes Jon 3:8

Bambai wen God garra deigidawei det samting, det taim na det brabli wikitwan men garra kamat, en im garra kaman garram pawa brom Seitin, en im garra dumbat olkain klebabala ting, en im garra yusumbat olkain

laiyawan stori en ekshan blanga meigim ola pipul bulurum im. Bat wen Jisas Kraiss det boswan garra kaman, im garra jis tok garram im maus, en im garra kilim det brabli wikitwan men ded, en det brabli shainiwan lait blanga Jisas Kraiss garra binijimap det wikitwan men brabliwei.

—Sekan Thesaloniyans 2:8, 9

Wal pipul olabat jidan femili blanga im, (Jisas) en blanga tharran na imbin meigim miselp seim laik olabat, dumaji imbin wandi dai blanga bidim det boswan dibuldibul hu garram det pawa blanga meigim pipul dai.

—Hibrus 2:14

## IF YU LAIGIM JISAS BRABLIWEI, WAL YU NA 37 DET BRABLIWAN WEKINMEN BLANGA IM

Wal det Holi Spirit meigim wi laigim gija, en im meigim wi gudbinji, en im meigim wi jidan gudwei, en im meigim wi lisin en weit en nomo tok streidawei wen trabul kaman langa wi, en im meigim wi jidan kainbala en tridimbat pipul gudbalawei, en im meigim wi jidan wulijim najalot pipul gin trastim wi, en im meigim wi nomo reken miselp langa enibodi, en im meigim wi jidan bos blanga wi bodi.

—Galeishans 5:22, 23a

Jisas bin tok, “Trubala ai dalim yumob. Ai garra dum enijing weya yumob askim langa main

neim. En if yumob laigim mi brabliwei, wal yumob garra duwit langa ol detlot wed main.”

—Jon 14:14, 15

En if enibodi reken im laigim God, en seimtaim im nomo laigim im braja, wal im dalimbat laiya. Yumob sabi? Nobodi bin luk God. Bat wibin luk wi braja olabat. En nobodi kaan laigim God en seimtaim nomo laigim im braja.

—Fes Jon 4:20

“En wen yumob laigim miselp lagijat, ebribodi garra sabi trubala yumob main wekinmen olabat.” Lagijat na Jisas bin tok.

—Jon 13:35

## 38 JISAS BIN GIDAP LAIBALA BROM DEDBALA

Melabat bin luk ebrijing weya imbin dumbat deya langa det kantri blanga ola Isreil pipul en langa Jerusalem. Detlot Isreil pipul bin neilimap im langa tri, en deibin kilim im ded. Bat thrideistaim God bin meigim im gidap laibala brom dedbala, en God bin meigim im shoum miselp langa loda pipul. Im nomo bin shoum miselp langa ebribodi. Imbin oni shoum miselp langa detlot pipul weya God bin pikimat, en melabat bin dagadagat daga en dringgambat garram im afta wen imbin gidap brom dedbala. —Eks 10:39-41

Bambai na wan wik afta ol

detlot wekinmen bin majurrumap miselp langa det haus igin, en Tamas bin deya garram olabat, en deibin lokimap ola dow a blanga det haus. Bambai na Jisas bin kamat langa olabat deya insaid langa det haus, en imbin jandap langa midul langa olabat, en imbin tok, “Yumob garra jidan gudbinjiwei.” Afta na Jisas bin dalim Tamas. Imbin tok, “Yu pudum yu bingga iya langa main bingga en yu luk gudwei. En yu pudum yu bingga langa main said du. En yu stap wanwanbat. Yu garra bilib langa mi weya aibin gidap laibala brom dedbala.” Wal Tamas bin tok, “Yu na main bos en main God!” —Jon 20:26-28

Jisas bin tok, “Yumob sabi? Trubala ai dalim yumob. Det taim garra kaman weya detlot pipul hu jidan dedwan insaidwei garra irrim det san blanga God tok. En det taim im iya olredi, dumaji mi na det san blanga God. “Wal yumob nomo wandi hatjamp wen mi tok langa yumob lagijat, dumaji det taim garra kaman weya ola dedbala pipul garra irrim mi jingat langa olabat, en dei garra kamat brom olabat greibiyad. Detlot pipul hubin oldei dumbat gudbala ting garra gidap laibala en jidan olagijawan. Bat ol detlot pipul hubin oldei dumbat nogudbala ting garra gidap

laibala en go langa det pleis weya God garra panishim olabat olagijawan.” Lagijat na Jisas bin tok.

—Jon 5:25, 28, 29

Bat if Jisas Kraiss im deya insaid langa yu, wal nomeda yu bodi garra dai brom det nogudbalawei, bat stil det Holi Spirit gibit yu laif, dumaji God bin meigim yu jidan raitwei langa im. Wal God bin meigim Jisas Kraiss gidap laibala brom dedbala, en if det Holi Spirit blanga God jidan insaid langa yu, wal bambai God garra meigim yu bodi gidap laibala brom dedbala du thru det Holi Spirit.

—Romans 8:10, 11

## 40 WI GARRA JIDAN RAITWEI LANGA GOD OLAGIJA

Wal main gudfren olabat, wen God bin tok detlot wed, imbin pramisim detlot wed langa wi. En blanga tharran na wi garra meigim miselp klinbala en nomo bulurrumbat detlot nogudbala ting weya meigim wi nogud insaidwei en atsaidwei. En wi garra trai en jidan brabli gudbalawei nomo garram enijing rong, dumaji wi garra rispek God brabliwei. —Sekan Karinthiyans 7:1

God det dedi blanga wi bin pikimat yumob, dumaji imbin abum im ronwan plen blanga yumob, en det Holi Spirit bin kadimat yumob blanga meigim yumob jidan blanga God, dumaji

God bin wandim yumob garra lisin en duwit langa Jisas Krai, en imbin wandim det blad blanga Jisas Krai garra meigim yumob klin brom yumob nogudbalawei.

—Fes Pida 1:2a

Yu sabi? Im lagijat na. If yu wandi jidan gudwan wekinmen langa det haus blanga God, wal yu garra meigim miselp klin brom ol detlot nogudbalawei blanga yu, en yu garra jidan oni blanga God det bos blanga yu wulijim im garra yusum yu blanga dum det speshalwan wek blanga im, en yu garra jidan redi blanga dum ola gudbala ting weya im wandim yu blanga dum. —Sekan Timathi 2:21

## WI GARRA JIDAN RAITWEI LANGA GOD OLAGIJA 41

Yu si? Lagijat gin Jisas bin dai  
atsaid brom det taun blanga  
meigim ebribodi fri brom olabat  
nogudbalawei garram im ron  
blad. —Hibrus 13:12

Wal bifo God bin meigim dis  
wel, imbin pikimat wi blanga  
joinimap wi langa Jisas Kraiss en  
meigim wi jidan im ronwan pipul  
nomo garram enijing rong. En  
yumob lafta larram det Holi  
Spirit meigim yumob hat en main  
nyubala, en yumob garra meigim  
yumob laif nyubala jis laik yu  
werrimon nyubala klos wen  
sambodi gibit langa yu. God bin  
gibit yumob det nyubala laif  
blanga meigim yumob jidan

gudbalawei, nomo garram enijing  
rong seimwei laik im.

—Ifishans 1:4 en 4:23, 24

Bat God im oldei jidan trubala  
langa wi, en im oldei gibit wi  
feyago, en if wi onap langa im  
blanga ol detlot nogudbala ting  
weya wi dumbat, wal im garra  
larrango wi fri brom ol detlot  
nogudbala ting, en afta im garra  
andimwei det nogudbalawei  
blanga wi. —Fes Jon 1:9

En yumob garra trai en jidan  
gudbalawei garram ebribodi.  
Yumob kaan jidan eniwei. Oni  
blanga God yumob garra jidan,  
dumaji nobodi kaan luk God if dei  
nomo jidan lagijat. —Hibrus 12:14

## IF YU LAIGIM JISAS BRABLIWEI, IM SPIRIT JIDAN INSAID LANGA YU

“Yumob sabi na? Nomed a yumob nogudbala, bat stil yumob sabi blanga gibit yumob biginini olabat gudbala ting. En yumob sabi yumob dedi langa hebin im gudbala, en im oldei gibit brabli gudbala ting langa detlot pipul hu askim im. En if yumob askim im, wal im garra gibit yumob det Holi Spirit blanga im.” Lagijat na Jisas bin tok. —Luk 11:13

Wal wen deibin (wekinmen blanga Jisas) binij prei, det haus weya deibin abum det miting bin sheiksheik, en det Holi Spirit bin gowin insaid langa olabat, en imbin meigim olabat strongbala, en

deibin dalimbat ebribodi det wed blanga God streidat. —Eks 4:31

Bat yumob hu garram det Holi Spirit blanga God insaid langa yumob nomo bulurum wanim det nogudbala filing blanga yumob dalim yumob. Yumob bulurum wanim det Holi Spirit dalim yumob. Yu si? If enibodi nomo garram det Holi Spirit blanga Jisas Krai, wal im nomo blanga Jisas Krai. —Romans 8:9

En nomeda dubala bin gowei brom Entiyak, bat stil ola bilibamob deya bin gudbinji, en det Holi Spirit bin deya garram olabat. —Eks 13:52

Wal Jisas bin dalim det dediwān. Imbin tok, “Wal wotabat yu? God gin dum enijing blanga enibodi if dei bilib langa im.”

—Mak 9:23

Wal main gudfren olabat, yumob kaan hatjamp wen yumob abum enikain adwan trabul weya oldei testimbat yumob tudei, dumaji yumob sabi yumob garra abum detkain trabul. En wen yumob abum detkain trabul, yumob garra gudbinji, dumaji yumob abum det trabul seimwei laik Jisas Kraibin abum. Im jis laik yumob bin joinin garram det trabul weya imbin abum, en blanga tharran na

yumob garra brabli gudbinji wen im garra kambek garram det brabli shainiwan lait blanga im blanga gajim yumob. —Fes Pida 4:12, 13

God imself garra jidan garram olabat, en im garra meigim olabat gudbinji. Dei kaan kraikrai na. Nobodi kaan dai. Nomo enijing kaan ardimbat enibodi. Ol detkain ting binij na. Det olbalawei im binij.

—Rebaleishan 21:4

Ol yumob pipul hu wandi dumbat wanim God wandim, yumob blanga dum yumob garra gudbinji, dumaji God garra meigim yumob sedisfaid brabliwei.

—Methyu 5:6

## 44 WEN SEITIN TEMTIMBAT GOD PIPUL OLABAT, JISAS OLDEI ALBUMBAT OLABAT

Wal tudei Jisas gin album detlot pipul weya det dibuldibul temtimbat olabat, dumaji det boswan dibuldibul bin temtimbat im du, en imbin go thru langa det trabul.  
—Hibrus 2:18

Wal oni God na meigim pipul jidan gudwei. En nomo longtaim na im garra binijimap Seitin det boswan dibuldibul en meigim yumob jidan bos oba langa im.  
—Romans 16:20a

En wi sabi God oldei wekimat ebrijing gudwei blanga album ol detlot pipul hu laigim im. En God bin jingat langa detlot pipul na

blanga dum wanim im wandim olabat blanga dum. —Romans 8:28

Ebrijing weya temtimbat yumob oldei temtimbat ebribodi du, en God oldei album wi jis laik weya imbin pramisim wi, en im kaan larram enijing mowa strongbala langa wi temtim wi. En wen enijing temtim wi, God oldei gibit wi pawa en meigim wei blanga wi blanga go thru langa det trabul. —Fes Karinthiyans 10:13

Jisas bin tok langa Saiman Pida. “Wal aibin prei blanga yu, Saiman, wulijim yu garra bilib brabliwei en nomo slekbek.”  
—Luk 22:32

# GOD IM PRAMIS GUDBALA TING LANGA DETLOT PIPUL HU GARRA WIN

45

Detlot pipul hu nomo gobek,  
detlot pipul hu win, wal mi na God  
blanga olabat, en ai gulum olabat  
main san. —Rebaleishan 21:7

Detlot pipul hu garra win, ai  
garra meigim olabat jidan deya  
langa det haus blanga main God.  
Dei garra jidan deya garram God  
olagija. En ai garra raidimdan  
thribala neim langa olabat. Ai  
garra raidimdan langa olabat det  
neim blanga God, en ai garra  
raidimdan langa olabat det neim  
blanga det nyuwan taun blanga  
main God. Det taun na det  
nyuwan Jerusalem, en det taun

garra kamdan brom top brom  
main God. En ai garra raidimdan  
langa olabat main ron nyuwan  
neim du. —Rebaleishan 3:12

“Wal yu lisin na garram yu  
irriwol. Yu lisin langa det spirit  
blanga God en langa det wed  
weya im tok langa ola tjetj,  
dumaji langa detlot pipul hu  
garra win, ai garra larram olabat  
dagadagat daga brom det tri  
blanga laif deya langa det  
gudbala kantri blanga God, en  
wen enibodi dagadagat daga  
brom det tri, im meigim olabat  
jidan laibala olagija.” Lagijat na  
Jisas bin tok. —Rebaleishan 2:7

Wal mi tok langa ol yumob merrit pipul na. Jisas Kraiss det bos blanga wi bin gibit mi dis wed streidat blanga dalim yumob. Ola waif kaan libum olabat hasbin. Bat if eni waif libum im hasbin, wal im kaan merrit langa enibodi. Oni langa det seimwan hasbin igin. En im seimwei lagijat du blanga ola hasbin. Dei kaan libum olabat waif.

—Fes Karinthiyans 7:10, 11

Wal yumob jingabat det dubala merrit kapul. Det lau im meigim det gel jidan garram im hasbin raidap im hasbin dai, en wen im hasbin dai, det lau kaan jidan bos oba langa det gel na, en

det gel im fri blanga go en merrit langa naja men. Bat if im merrit langa naja men bifo im hasbin dai, wal im dum nogudbala ting en im breigim det lau. Yu si? If det gel im merrit langa najawan men wen im hasbin dai, wal im nomo dum nogudbala ting en breigim det lau, dumaji im hasbin bin dai en det lau nomo jidan bos oba langa im na.

—Romans 7:2, 3

Jisas bin tok, “If eni men libum im waif, en im merrit langa najawan gel, wal im breigim det lau blanga God. En if enibodi merrit langa det gel hubin libum im hasbin, wal det men im breigim det lau seimwei du.” —Luk 16:18a

Jisas bin tok, “Ai garra go en meigim det pleis redi blanga yumob, en afta ai garra kambek en gajim yumob miselp en deigim yumob blanga jidan weya ai garra jidan.”  
—Jon 14:3

“Nomo longtaim na ai garra kambek. Wal yu garra wotjimat yuselp na. Yu nomo wandi slekap en larram enibodi bidim yu. Yu nomo wandim enibodi pulumat yu det ting weya God garra gibit langa yu.”  
—Rebaleishan 3:11

“Det taim na ebribodi garra luk det speshalwan mak blanga mi. Mi na det speshalwan men weya God bin jandim, en ebribodi garra luk main mak deya langa skai, en

ola pipul langa ebri kantri garra sori miselp, en dei garra luk mi kambek garram klaud brom hebin, en ai garra shain detmatj garram main pawa.” Lagijat na Jisas bin tok.  
—Methyu 24:30

En lagijat na yu garra weit en jandap strongbala, dumaji im gulijap taim blanga Jisas Kraiss det bos blanga wi garra kambek.  
—Jeims 5:8

“Bat yumob kaan bilib det wed, dumaji wen ai garra kambek, ai garra kambek jis laik det laitining weya ebribodi luk langa skai. Ebribodi garra luk mi kambek.” Lagijat na Jisas bin tok.  
—Methyu 24:27

Dubala men garram waitwan klos bin jandap wansaid langa olabat, en dubala bin tok, "Ei! Ol yumob men brom Gelali! Wotfo yumob jandapbat iya lukinatbat langa top? Det seim Jisas weya yumob bin luk im gowap langa hebin, im garra kambek lagijat seimwei igin." —Eks 1:11

Wal main gudfren olabat, wi jidan biginini blanga God na. Bat wi nomo sabi hau wi garra jidan bambai. Bat wi sabi wen Jisas Kraiss garra kambek, wi garra jidan seimwei laik im, dumaji det taim na wi garra luk im brabliwei hau im jidan. En ebribodi hu

weidabat blanga im blanga kambek garra jidan tudei nomo garram enijing rong langa olabat seimwei laik Jisas Kraiss nomo garram enijing rong langa im.

—Fes Jon 3:2, 3

"Ai garra kaman jis laiga stilinbala. Yu kaan sabi wotaim stilinbala garra kaman langa yu kemp. Maitbi yu deigmatbat klos blanga silip, en det stilinbala kaman en deigidawei ol detlot klos, en neksdei yu garra sheim, dumaji yu wokaran neigidbala. If yu wandi jidan gudwei, wal yu garra kipgon wotjimatbat yuselp, nomo silip." Lagijat na Jisas bin tok. —Rebaleishan 16:15

## DIJAN WED BLANGA GOD

En nobodi kaan gajimap detlot mining blanga detlot wed miselp, dumaji ol detlot speshalwan wed nomo bin kamat brom men ronwan filing. God bin gibit detlot wed, en det Holi Spirit bin meigim detlot speshalwan mesinja tok detlot wed. —Sekan Pida 1:21

Ebri wed langa det baibul bin kaman brom God, en ebri wed im brabli gudbala blanga lenimbat wi wanim trubala, en im gudbala blanga shoum wi weya wi rong, en im gudbala blanga streitinimap wi, en im gudbala blanga meigim wi sabi det raitwei.

—Sekan Timathi 3:16

## YU GARRA PREI

“Dedi langa hebin, yu neim im brabli haibala, en melabat nomo wandim enibodi garra yusum yu neim nogudbalawei. Melabat wandim yu garra kaman en jidan bos langa melabat. Melabat askim yu blanga gibit melabat daga blanga dagat tudei. Melabat bin larramgo fri detlot pipul hubin dumbat nogudbala ting langa melabat, en melabat askim yu blanga larramgo melabat fri du. Melabat askim yu nomo blanga larram enijing testimbat melabat brabli adbalawei.”

—Luk 11:2b-4

Published in numerous languages by World Missionary Press, Inc., as God supplies funds in answer to prayer. **For questions or more information by country, visit: [www.wmp-contacts.org](http://www.wmp-contacts.org)**

World Missionary Press  
PO Box 120  
New Paris, IN 46553-0120 USA  
[www.wmpress.org](http://www.wmpress.org)

9-25



Read booklets online or by App  
[www.wmp-readonline.org](http://www.wmp-readonline.org)

259 Kriol HFA